



PRIMEIRU MINISTRU

**DISKURSU
SUA EXCELÊNCIA PRIMEIRU-MINISTRU
KAY RALA XANANA GUSMÃO NIAN**

**IHA OKASIAUN SELEBRASAUN
25.º ANIVERSÁRIU POLÍSIA NASIONÁL TIMOR-LESTE**

Palásiu Governu

27 marsu 2025

Sua Eselénsia Señora Presidente Parlamentu Nasionál
Sua Eselênsia Señor Presidente Tribunal Rekursu

Eselénsias, Distintus Deputadus no Membrus Governu
Exmu. Señor Xefe Estadu Maior-Jenerál F-FDTL no Xefe Estadu-
Maior

Ilustres Konvidadus husi Korpu Diplomátiku no Sosiedade Sivil
Ilustres Konvidadus husi Forsas Polisiais Estranjeiras no Guarda
Nasionál Republikana (GNR)

Exmo. Señor Komandante-Jerál Polísia Nasionál Timor-Leste
Señores Komandantes Unidades no Xefes Servisu
Señoras no Señores Ofisiais, Sarjentus, Ajentes ho Funsionárius Sivils
PNTL,

Orgullu no onra bót tebetebes mai ha'u bele celebra hamutuk ho ita-
bót sira 25.º Aniversáriu Polísia Nasionál Timor-Leste, instituisaun
fundamentál iha seguransa ho estabilidade país.

Señoras no Señores Membrus PNTL, ba imi hotu-hotu, ha'u hato'o
parabéns! Né hanesan oportunidade únika ida hodi rekoñese no agradese
imi hotu nia profissionalismu ho imi-nia dedikasaun ba povu timor.

Ohin, dia 27 marsu 2025, ita la celebra de'it imi-nia instituisaun nia
aniversáriu, maibé mós hanesan momentu istóriu ida kona-ba
transformasaun institusionál.

PNTL, hanesan ita-bót sira hatene, moris kedan ona bainhira hahú
construsaun Estadu ida-né, mesmu molok restaurasaun ofisiál
independénsia. No, hahú husi nebá, instituisaun ida-né hasoru obstáculos,
krisis no desafius bót, husi loron ba loron, tinan ba tinan.

Hanesan ho instituisoens sira seluk nasaun né nian, Polísia Nasionál mós mosu mai husi ahu-kudesan laran, hodi ohin-loron sai hanesan: pilar (ka, ai-rín) bót demokrasia nian hodi servi ba povu!

No, prosessu konsolidasaun responsabilidades kona-ba seguransa ho estabilidade país né nian, la sés husi susar no terus. Maibé, maski hasoru desafius oioin, ami hetan susessus barak.

Tanba né, ohin, hanesan oportunidade di'ak ida atu ita selebra. La selebra de'it tinan ida tan husi esisténsia PNTL, maibé mós legadu tomak ida kona-ba superasaun ho maturidade iha prestasaun servisu husi membrus PNTL sira ba timoroan tomak.

Eselénsias

Ilustres konvidadus,

PNTL desempeña ona papel nebé vital tebes iha manutensaun ordem públika, hodi garante ita hotu bele moris iha comunidades nebé seguras no moris hakmatek. Kompromissu bót ba seguransa públika né, merese ita hotu nia profundu respeitu.

Promosoens nebé ohin halo né, la representa de'it sentimentu ida-né maibé mós dever husi Estadu. Representa mós kompromissu husi Governu atu promove kultura institusionál ida nebé valoriza korajen, sakrifísiu, disiplina no prestasaun servisu, hodi garante kontínuo reforsu iha kapasidade institusionál ita-nia Polísia nian.

Promosoens hirak-né, nebé prevé hotu ona iha ida-idak nia Estatutus, hakarak korijji desekilíbrius istórikus, hametin estrutura komandu, rekoñese kontributus extraordináriu, no mós rekoñese kapasidade lideransa iha momentus difíseis.

Prosessu nebé ohin atinje nia pontu másimu, reflete esforsu nasionál nebé foin primeira vez akontese: mais de 2.763 polísias mak hetan promosaun, hodi nuné transforma, kle'an tebes, estrutura PNTL.

Transformasaun husi jerasaun ba jerasaun né sei promove forsa seguransa ida nebé ho kapasidade profesionál, nebé orienta ho valores fundamentais hanesan ierarkia, disiplina no integridade.

Ha'u hakarak mós aproveita hodi informa katak prosessu promosaun né tomak hala'o tuir kritérius rigorosus, no supervisona husi komissaun ida nebé independente husi kualker influênsia ho karákte polítiku ka sosiál (hanesan grupus husi artes marsiais). Né prosessu ida nebé hetan participasaun husi membrus PNTL sira hotu, hodi nuné bele garante total transparênsia ho meritokrasia iha kada desisaun.

Promosoens hirak-né fó onra (ka valoriza) formas servisu oiain ba nasaun, inklui antiguidade ho esperiênsia, participasaun iha luta ba independênsia ho lealdade institusionál durante krise 2006-2008, nebé membrus PNTL hamrík metin nafatin, hasoru ameasa ba esistênsia instituisaun, no arriska sira-nia moris rasik hodi proteje povu, nu'udar símbolus no órgãuns soberania nasionais.

Tanba né, iha ámbitu aperfeisoamentu konstante (ka kontínuo), mak renovasaun ierárkisa ida-né hanesan fortalesimentu bót ida ba estrutura komando no lideransa, ho efeitos transformadores.

Transformadores tanba ita presiza la'ós de'it assegura continuidade iha prestasaun servisu nebé halo ona, maibé hadi'a frajilidades, liuhosi transmissaun valores ho práttikas fundamentais ba jerasoens foun husi polísia.

Progressaun husi jerasaun ba jerasaun né sei hametin liután estrutura komando superior no lideransa, hodi nuné instituisaun PNTL bele konta ho kuadru ofisiais no xefias intermédiás nebé konstituídu (ka kompostu) husi profesionais ho esperiênsia barak no koñesimentu institusionál kle'an,

nu'udar elementus essenciais atu assegura konsolidasaun servisu, profissionalismu ho disciplina.

No entantu, promosoens la signifika de'it rekoñesimentu, maibé mós responsabilidades nebé bót liután. Ofisiais ho sargentos foun sira-nia missaun mak atu lidera ho ezemplu no hasa'e padroens profissionalismu PNTL nian.

Aumentu bot iha kuadru komandu nian, permite agora implementa reformas operacionais nebé presiza kleur ona, hodi hadi'a kapasidade fó resposta iha territóriu nasional tomak.

Eselénsias

Señoras no Señores,

Ha'u fiar katak loron ohin né assinala la'ós de'it konklusaun husi prosessu ida, maibé inísiu husi era (ka époka) foun ida ba PNTL.

Era ida-nebé ho estrutura komandu renovada no fortalecida signifika preparasaun bót liután atu hasoru desafius instituisaun no país tomak nian, inklui desafius tanba integrasaun iha organizasoens hanesan ASEAN ho organizasoens multilaterais sira seluk.

Era ida nebé signifika mellorias iha kapasidade iha planeamentu, formasaun no administrasaun rekursus nebé adekuadus ba mundu ida iha mudansa, nebé desafius nebé ita hasoru mosu ho maneira imprevisível (katak tekitekir de'it).

No mós, era ida nebé ho prevensaun no kombate ba krime nebé di'ak liu, bele kontribui hodi aumenta liután konfiansa iha instituisoens demokrátikas. La'ós de'it liuhosi protesau no assisténsia ba sidadauns sira, maibé iha preservasaun direitus umanus.

País né preziza la'ós de'it atu PNTL promove bem-estar sidadauns nian, maibé, liuliu, atu hakbesik-an ba sidadauns timoroan sira ho ema sira nebé, maski sira la'ós timoroan, sira hela iha ita-nia país.

Ha'u fó-hanoin, katak PNTL la servisu mesak! Ninia kapasidade ho seguransa nasional rasik depende ba koordenasaun esforsus husi Estadu, husi Governu no husi Forsas Defeza no Seguransa, tuir Lei ho Konstituisaun.

No ba seguransa ita hotu nian, importante mós kolaborasaun husi comunidades ho lideransas lokais, iha ambiente parseria nebé permite hametin konfiansa ba malu, no ema hotu-hotu bele servisu hamutuk ba paz no ba prosperidade país.

No, ko'alia kona-ba parseria, ha'u la haluha hato'o ha'u-nia apresu ba países doadores no amigus sira hotu, liuhosi kooperasaun internasionál, nebé importante tebetebes desde data kriaun PNTL.

Ohin ita celebra mós lasus kooperasauno histórica hirak nebé permite desenvolve no kapasita ita-nia forsas polisiais. Ha'u agradese, liuliu, ba presensa husi GNR iha selebrasoens né no ha'u subskreve kondekorasaun nebé fó. Iha tinan 25 laran GNR kontribui ba paz no estabilidade iha país no ba formasaun ita-nia forsas seguransa.

Governu Austrália mós apoia PNTL iha fortalesimentu ninia kompetências ho kapasidades liuhosi Programa kona-ba Dezenvolvimentu Polisia Timor-Leste, nebé funsiona ona liu tinan 20.

Timor-Leste mós agradese ba Nova Zelândia ba apoiu nebé fó ba PNTL liuhosi Programa Apoiu ba Polisiamentu Komunitáriu.

Molok atu hakotu, ha'u halo votos atu insígnias sira nebé ohin simu né labele hanesan de'it símbolus rekoñesimentu ba passadu, maibé hanesan kompromissus ba futuru ida ho eselénsia, integridade, disiplina no dedikasaun ba povu timor tomak.

Ha'u husu ba imi hotu atu kontinua sai hanesan motivu orgullu bót ba imi-nia comunidades ho familiares. Imi tenke kontinua inspira timoroan tomak ba dezvoltimentu sosiedade ida nebé pasífika, tolerante no próspera, tuir ita hotu nia mehi tinan 25 liubá.

Viva PNTL! Viva Timor-Leste!

Obrigadu wa'in.

Kay Rala Xanana Gusmão